



GOVERNUN KONSTITUSIONÁL IV
SEKRETARIA ESTADU KONSELLU MINISTRU

KOMUNIKADU BA IMPRENSA

Sorumutu Konsellu Ministru Loron 10 Fulan Maiu tinan 2010

Konsellu Ministru hala'o Sorumutu iha Segunda-feira, loron 10 fulan Maiu 2010, iha Sala Sorumutu Konsellu Ministru, iha Palásiu Governu, iha Díli, no aprova ona:

1. Dekretu Lei N º 4/2008 loron 4 fulan Marsu, kona-ba Orgánika Ministériu Negósiu Estranjéiru nian

Proposta alterasaun ba estrutura Orgániku Ministériu Negósiu Estranjéiru nian, ohin apresenta ona iha Sala Sorumutu Konsellu Ministru, hodi klarifika atribuisan sira no kompeténsia ba Servisu Ministériu nian. Ministériu hanoin katak presiza hadi'a, aumenta no adapta organizasaun sevisu nian inklui mós misaun diplomátika no postu konsulár sira no mós promove profesionalizmu, atu servisu sira ne'e bele sai efikás no hetan rezultadu diak. Nia aprovasaun sei hatama fila fali ba Sorumutu Konsellu Ministru semana oin mai.

2. Apresentasaun Levantamentu kona-ba Persepsaun Kualidade Servisu

Ministériu Finansa prezanta ona, ba Konsellu Ministru, rezultadu avaliasaun kona-ba kualidade servisu nian ne'ebé mak husu ba Asia Foundation. Avaliasaun ne'e halo iha fulan rua uluk iha tinan ida ne'e no bazeia ba persepsaun kliente sira nian katak mekanizmu reporte periódiku ida ne'ebé hili ne'e mak bele ajuda prosesu servisu Ministériu Finansa nian di'ak liu tan.

Tuir estudu ida fó sai katak, interasaun ne'ebé mosu beibeik ho prosesu aduaneiru, hatudu satisfasaun nível ida ne'ebé kiik tanba konsidera komplikadu loos. Iha seluk fali, bainhira uza Despaixante hatudu katak, iha vantajen no presiza tebes.

Kona-ba impostu sira, nia rezultadu hatudu katak informasaun fiskál hirak ne'ebé fó tiha ona ne'e mesak diak. Kona-ba aprovizionamentu, nível satisfasaun no konfiansa nian tun, bele dehan katak sei presiza haburas nia kualidade no asesu ba informasaun kona-ba konkursu nian.

Atu oinsá mós, bele dehan katak, tenke continua nafatin hodi hetan informasaun kona-ba reasaun hosi parte kliente sira no mos halo avaliasaun ba reforma no hadi'a hikas nia prosesu. Disponibilidade no asesu

ba informasaun nian tenke di'ak liu ona, formasaun kontinua (ho formasaun no sesaun traballu esternu nian) atu bele aumenta kualifikasaun no kapasidade interna nian, hodi hala'o dezempeñu.

3. Apresentasaun Sínteze Planu Reintegrasaun estudante medisina hamutuk nain 465 ne'ebé fila fali mai Timor Leste iha tinan 2010

Iha tinan ne'ebé estudante medisina hamutuk nain atus haat nenulu resin lima (465) fila fali mai país, Ministériu Saúde (MS) apresenta ona sínteze Planu Reintegrasaun estudante Medisina sira ne'ebé hela dauduan iha Cuba.

Proposta Reintegrasaun tama iha programa Dezenvolvimentu Rekursu Umanu Saúde nian maibé kustu hirak ne'ebé afeta ba sira la tama iha Orsamentu Jerál Estadu nian ba tinan 2010.

Tanba ne'e mak, MS apresenta orsamentu ne'ebé nia konsidera presiza tebe-tebes hodi implementa proposta Planu ida ne'e. Iha orsamentu ne'e, iha konsiderasaun ba viajen, treinamentu iha distritu sira, konstrusaun no reabelitasaun ba Sede sira, materiál no ekipamentu eskritóriu nian, dosentes sira, materiál mobiliáriu, transporte, akomodasaun, ekipamentu laboratóriu no ekipamentu médiku sira no seluk-seluk tan.